

20
21

ISLA ((•)) **ONLINE**

Diabierna 1 October 2021

Email: IslaOnline@gobierno.aw Tel: 528-4952



CONOCE NOS MINISTERNAN DI Gabinete Wever - Croes II

Aruba mester di nos TUR!

KEN TA NOS MINISTER PRESIDENT, EVELYN WEVER-CROES

Gabinete Wever-Croes 2. Un gobierno consistiendo di 8 minister. 4 minister cu a sirbi caba den Gabinete Wever-Croes 1 y 4 cara nobo. Bou liderasgo di Minister President Evelyn Wever-Croes.

Ken ta Evelyn Wever-Croes?

Evelyn (54) ta casa cu Kenneth Wever pa 30 aña, ta mama di 3 yiu, Christine, Kevin y Claudine y wela di un nieto, Trystan.

Evelyn ta yiu di Mech y Dick. Mech a traha den enseñansa. Ultimo añanan Mech ta dedica na musica y e Coro Crystal, cu por cierto ta cuminsa bek, despues di a tuma un pausa. Dick ta abogado pa casi 55 aña, na e momento aki e abogado cu mas aña di experiencia na Aruba.

Evelyn a cuminsa studia medicina na Costa Rica despues cu el a caba su VWO na Colegio Arubano cu 17 aña. Pero lihe el a realisa cu su pasion no ta den medicina sino riba e area legal y asina a cambia di estudio, siguiendo pasonan di su tata y a specialisa den ley fiscal (belasting). Evelyn a obtene su titulo di "Meester in het Fiscaal Recht" na edad di apenas 22 aña na RijksUniversiteit Leiden y a bolbe Aruba mesora pa cuminsa cu su carera profesional na aña 1989.



CONTINUACION....



El'a traha 13 aña na Departamento di Impuesto, 9 aña como hefe di e departamento. Na aña 2003 Evelyn a haci e cambio pa sector priva y a traha 7 aña como consehero di belasting y como abogado. Su experticio riba tereno di belasting semper el a traspasa pa otro y a duna varios curso riba e tereno aki, siguiendo pasonan di su mama.

Na aña 2009, riba invitacion di Lider di MEP Nel Oduber y riba insistencia di su omo Rudy Croes, Evelyn a subi lista di MEP y a wordo scogi cu voto preferencial den Parlamento di Aruba. Na aña 2011 durante un Congreso di partido, Evelyn a wordo eligi como Lider di MEP cu un gran mayoria di voto. Asina Evelyn a bira e di tres lider di partido MEP despues di fundador Betico Croes, den feliz memoria, y Nel Oduber. E prome lider femenino di partido MEP.

Despues di eleccion 2013, Evelyn a keda eligi un biaha mas vu voto preferencial den Parlamento. Asina a completa un trayectoria di 8 aña den Parlamento. Den eleccion 2017 partido MEP a crece na 9 asiento pero no a sali e partido mas grandi. Sinembargo e partido mas grandi no kier a forma un coalicion. Evelyn a wordo nombra formador e ora.

Dia 17 november 2017 Evelyn a huramenta como e prome Prome Minister femenino di Aruba y a ocupa e funcion ey te cu awe. El'a enfrenta hopi reto y sin duda esun mas grandi tabata e crisis di Covid. Evelyn a demostra liderazgo firme combina cu empatia, husto



e liderazgo cu Aruba tin mester.

Dia 30 di maart 2021, el'a baha gobierno despues cu e partner den coalicion, POR, a haye involucra den un investigacion penal.

Eleccion dia 25 di juni 2021 a duna e resultado desea pa Evelyn: victoria pa su partido MEP. No solamente el'a haci di MEP e partido mas grandi bek, sino el'a bira e votegetter di pais Aruba cu 7.518 votos. Evelyn a wordo nombra formador un biaha mas y despues di un proceso di formacion extenso, den cual a reuni cu 115 stakeholders, a forma un coalicion cu partido RAIZ.

Awe nos ta bay mira su huramentacion como Minister President den Gabinete Wever-Croes 2.
Pabien Aruba!

KEN TA NOS MINISTER DI TRANSPORTE, INTEGRIDAD, NATURALES Y ASUNTONAN DI ADULTO MAYOR, URSELL ARENDS



Ursell Mikhail Arends, naci 29 di Augustus 1980, casa cu sra. Tamarah Arends Croes, tata di dos yiu teenager, Ayden y Avah Arends. Ursell a bay scol basico na Oranjestad, Mon Plaisir School y scol secundario Mon Plaisir College. Despues Ursell di a obtene su general arts and science (AA degree), Ursell a sigui studia y a gradua den International Business Management for di St. Clair College na Windsor Ontario Canada, na 2005.

Como hoben, gran parti di Ursell Arends su hubentud a wordo disfruta den bario di Santa Cruz. Desde su infancia el a gusta deporte y a practica e deportenan di futbol y bowling. E consistencia y disciplina di deporte a fungi como e fundeshi pa su desaroyo. Den e deporte di bolwing, Ursell a representa Aruba den exterior na varios ocasion. E tabata tin e honor tambe di forma parti di e bestuur di Arubaanse Voetbal Bond (AVB) for di 2011 te cu 2015 como miembro di directiva, tesorero y tambe como e Team Manager di nos seleccion nacional.

CONTINUACION....



Ursell ta considera su mes un “young professional” na curason. El a labora den e ramo turistico pa mas di 15 aña. Como un young professional, su carera profesional a cuminsa na La Quinta Beach Resort como Human Resources Manager for di 2006 te cu 2015. Na 2015 mi a wordo nombra como Operations Director di La Quinta Beach Resort cual funcion el a ehrece te ora cu el a huramenta como parlamentario na July 2021. Durante e trayectoria como profesional den sector di turismo, Ursell a sirbi tambe como presidente di Aruba Timeshare Association (ATSA) for di aña 2016 te cu 2018.

Entrada den Politica:

RAIZ a wordo lanta na 2017 pa hobennan Arubiano cu kier a cuminsa cu un movcion politico y tabata sa di scucha, atende y cumpli cu necesidadnan y deseonan di e pueblo. Den su participacion na eleccion dia 25 di Juni 2021, Sr. Arends a logra un total di 1939 voto di confiansa, un alegria y honor enorme pa por representa e bos di e personanan aki y ademas sirbi pueblo completo dignamente.

“Mi vision ta pa hiba e pueblo na un miho porvenir y establece oportunidadnan nobo pa nos futuro generacionnan por gosa di dje. Mi ta kere fervientemente den e mision pa crece nos plataforma progresivo y establece solucionnan duradero pa nos Aruba”.

Tin cambio fundamental cu ta necesario. Manera reforma gubernamental, solucion pa desperdicio solidio y likido, desaroyo sostenibel conhunto cu derecho di naturalesa. Tambe ta necesario por ehempel pa tin



vivienda adecuado y pagabel pa nos adultonan mayor cu tin mas necesidad, trece diversificacion stabil di empleo cual ta sirbi como e pilar di famia, y tambe brinda seguridad pa nos hendenan.

“Mi mensahe semper lo keda uno di speransa y optimismo; nos kier keda leu di politica toxico y anticua. E proposicion ta pa apodera nos isla su hendenan y tuma bek e rienda di nos pais.

Si nos pueblo uni hunto y lucha hunto, nos lo por crea un miho Aruba. Nos agenda comun lo mester kibra tur barera. Mi ta enfatisa cu nos tur mester usa nos consenshi y coopera hunto pa por logra nos metanan comun den sociedad

Nos tur mester di otro, no ta importa cual partido politico bo ta sostene, no ta importa di unda bo ta bin, no ta importa ken bo ta stima y no ta importa bo color di cuero, religion of status social. Pasobra ningun hende por biba nan so, Aruba Mester Di Nos Tur!

KEN TA NOS MINISTER DI FINANSA Y CULTURA, XIOMARA MADURO



Dialuna, dia 20 di september 2021
Pais Aruba a haya un Gobierno
nobo, Gabinete Wever-Croes 2. Un
Gobierno di 8 Minister y desde e dia
ey, Xiomara Maduro ta encarga cu e
carteranan di Finansa y Cultura.

Ken ta Xiomara Maduro?

Xiomara tin 46 aña di edad, ta
soltera y ta mama di un yiu homber,
Ethan Ruiz, cu tin 14 aña di edad.
Xiomara ta yiu di Antonia Ras, miho
conoci como Chida y Antonio Maduro
(q.e.p.d.), miho conoci como Tommy.
Xiomara su mama tabata traha na
Casa Haime y New Amsterdam Store
y su tata na Bureau Interne Diensten
den Gobierno.

Xiomara a hereda su mama su
sonrisa, cu ta un refleho di su curason
y character. Su mama tin un bon
curason y semper ta gusta yuda tur
hende. Tras di su bunita sonrisa, tin un
character fuerte y 'e ta riba su punto'.

Na un edad relativamente hoben
Xiomara su mama a cuminsa traha pa
yuda su famia. Door di esaki su mama
semper a motiv'e pa e studia.

CONTINUACION....

Su tata tabata un sosten grandi na momento cu ela drenta politica. Ta door di su tata, Xiomara a siña bira un persona hopi social cu ta gusta combersa cu tur hende. Su tata a inspir'e pa lesa hopi desde un edad jong pa asina amplia su conocimiento tur dia. Lamentablemente Xiomara su tata a bay descansa net 6 luna prome cu eleccion di aña 2017. Xiomara ta conoci como un mandatario carismatico y apesar di tur reto cu e ta enfrenta, semper e tin un sonrisa riba su cara.

EDUCACION

Xiomara a bishita Imelda Kleuterschool y a cuminsa Sint Dominicus College cu apenas 5 aña. Ora cu ela caba esaki, ela bay La Salle College MAVO unda cu na 1990 ela gradua como 'best geslaagde'. Xiomara a sigui studia y a bay Colegio Arubano HAVO y VWO, cual ela caba na aña 1995. Despues di esaki, Xiomara a bay studia na Hulanda, unda ela studia Management, Economie & Recht y a obtene su 'Bachelor Degree in Economics' na Hogeschool van Arnhem en Nijmegen na aña 1999. Xiomara a continua cu su estudio na Universidad di Groningen na unda ela a studia Nederlands Recht cu specialisacion den Bedrijfsrecht. Finalmente na november 2002 ela obtene e titulo di 'Meester in de Rechten' cual ta un logro cu e ta hopi orguyoso di dje.

CARERA PROFESIONAL

Xiomara a regresa Aruba bek na aña 2003 y ela traha 6 aña como Funcionario di Maneho (Beleidsmedewerker) na Meldpunt Ongebruikelijke Transacties (MOT), awor Financial Intelligence Unit. Durante su trabou ela capacita su mes como un Certified Anti-Money Laundering Specialist (CAMS) y tambe a sigui diferente curso pa asina amplia su conocimiento riba e tereno aki.

Comienso den politica

Na aña 2009 ex-Minister President Nelson Orlando Oduber a yama Xiomara na su despacho pa puntr'e pa subi riba lista di partido MEP. Su prome reaccion tabata un hari duro ya cu el'a gar'e di sorpresa y e no a spera e peticion aki pero Xiomara a acepta e reto. Asina ela tuma e decision pa subi e tarima politico di Aruba como candidato number 9 riba e lista di partido MEP pa e distrito di Playa.

CARERA POLITICO

Na augustus 2009 Xiomara a debuta como figura



politico na momento cu ela participa na eleccion electoral den september 2009. Ora cu lider honorario di MEP, Nelson Orlando Oduber a dicidi di no acepta su asiento den Parlamento di Aruba, secuencia di lista a pone cu Xiomara a bira Parlamentario di Pais Aruba. Di e manera aki ela cuminsa oficialmente den politica. Xiomara a asumi e funcion di Miembro di Parlamento pa 8 aña. Como Parlamentario Xiomara tabata conoci pa su actitud critico riba e maneho financiero. Na aña 2017 a toca Xiomara e honor pa sirbi Pueblo como minister di Finansa, Asuntonan Economico y Cultura den Gabinete Wever-Croes. Como mandatario, Xiomara a demostra di por maneha e carteranan aki y a surpasa e reto financiero mas grandi cu Aruba a conoce den aña 2020, door di e pandemia cu a afecta henter mundo.

Dia 20 di september 2021 Xiomara a huramenta como minister di Finansa y Cultura pa Gabinete Wever-Croes 2. Pa Xiomara e ta un honor pa por sigui sirbi Pueblo di Aruba.

KEN TA NOS MINISTER DI TURISMO Y SALUD PUBLICO, DANGUI ODUBER



Mi nomber ta Danguillaume Pierrino Oduber, nací 13 di Juli 1978, casa cu sra. Naliza Oduber Faarup, tata di dos yiu homber chikito, Zidane y Zander Oduber. Mi a bay scol basico na Madiki, Colegio Bon Bini, scol secundario La Salle College y Colegio Arubano. Despues mi a continua cu mi estudio di “Management Economie en Recht” na Hoge School “In Holland” na Rotterdam na unda mi a gradua como “Bachelor in Economics, den Management Economics & Law”, na 2005.

Desde mi infancia mi a gusta deporte y a practica e deportenan di tennis, futbol, baseball y atletismo. Deporte a siñami hopi disciplina cu a yuda mi den mi desaroyo. Mi a bira campeon di tennis den categorianan sub 14, sub 16 y sub 18 y na varios ocasion a representa Aruba den exterior. Den futbol mi a forma parti di e orguyonan di Noord, Bubali, pa varios aña. Mi a hunga futbol den varios seleccion di pais Aruba. Pa bo por tin un mente sano, bo mester tin un curpa sano. Deporte ta hopi importante den desaroyo di un ser humano.

CONTINUACION....

CARERA PROFESIONAL

Despues di a termina mi estudio na Hulanda, mi a cuminsa mi carera profesional na HDI Verzekeringen NV. Esaki ta un compania di seguro na Rotterdam. Na Hulanda mes mi a traha despues na Nationale Nederlanden den departamento di kleine maak- en beleggingen. Despues di e experiencia aki mi a bolbe Aruba caminda mi a labora pa shete aña na Setar N.V., for di 2006 pa 2013. Pa 5 aña largo mi a ocupa e funcion di “traffic and routing analyst” den departamento di “traffic & business”. Mi a sigui desaroya mi carera profesional como cordinador di “inkoop en logistiek” y despues como supervisor di departamento “inkoop en logistiek”.

ENTRADA DEN POLITICA

Na aña 2013 mi a drenta e arena politico y bira candidato di e prestigioso partido Movimiento Electoral di Pueblo (MEP). Mi escogencia pa drenta politica ta pa motibo cu mi no por a permiti mas mira nos pais bay den un direccion caminda nos futuro generacion ta wordo negligisha, lubida, endeuda y lo haya nan mes confronta cu hopi problema den futuro. E diferencia entre rico y pover no mag sigui crece pa motibo di decisionnan di preferencia politico. MEP semper a scoge pa un pais caminda e rikesa ta wordo parti honestamente. Esnan cu menos entrada mester por bay dilanti segun e desaroyo economico di nos pais. Hobennan mester ser brinda e oportunidad y sosten den tur nivel di educacion (y tambe na e hobennan cu a bay sigui nan estudio den exterior pa asina motiva nan pa bin bek nan pais pa yuda nos isla progresar).

Mi lo desea di crea un generacion progresivo, innovativo caminda tur hende lo forma parti di dje. Mi kier crea oportunidadnan igual pa un y tur na Aruba. Mi a sinti e yamada y e compromiso pa traha pa e progreso di e pais aki y kier lucha pa e porvenir di nos futuro generacionnan. Mi kier mira cambionan progresivo caminda tin participacion di tur hende den e comunidad aki. E movecion aki ta inclui proyectonan cu lo hiba Aruba den un etapa caminda transparencia lo prevalece y e pueblo ta goberna hunto cu MEP y bin cu e miho ideanan pa e “start-up” di un Aruba progresivo y renoba.

Mi ta forma parti di MEP pasobra mi ta kere den e partido aki y mi kier yuda nos pais y yuda esnan den necesidad.

LOGRONAN MAS IMPORTANTE

TURISMO

- Record den Turismo aña 2018 y 2019 pa loke ta cantidad di bishitante stayover y crusero. Tur indicadornan cu ta midi turismo tawata positivo. E REVPAR, e grado di ocupacion y esun mas importante e tourism receipt cu ta e cantidad di placa cu turistanan a laga atras
- Proyecto di renobacion y expansion di nos aeropuerto Gateway 2030
- Liderando e proyecto di Port City cu lo bay transforma e area di waf y crea un spinoff effect grandi den nos economia
- Construcccion di e boardwalk na Malmok fase 1 y 2
- Embeyecimento di proyecto Baby Beach fase 1
- A introduci e Island Festival Aruba pa asina e turista por experencia realmente e herencia cultural di Aruba
- A habri oficina di turismo na San Nicolas
- Inversion di 14 milyon florin den e tugboat Colorado
- Embeyecimento Brickel Bay
- Renobacion di e hut y trapi na pia di Hooiberg

A pone hopi enfasis di crea rutan nobo pa Aruba. Asina a crea



e vuelo directo cu American Airlines for di Chicago y Dallas. A percursa pa vuelo directo cu American Airlines for di La Guardia, New York. Tui tambe tawata tin un vuelo directo for di London.

SALUD PUBLICO

- A logra Arubig
- Converti Imsan den un hospital di shortstay cu 22 cama
- Pa prome biaha aruba tin un Plan Nacional di Prevencion di malesanan NCD's
- A inverti den e miho centro di radio terapia di caribe na Imsan. Un inversion di 60 milyon florin cu a crea mas di 100 cupo di trabou pa San Nicolas. E inversion aki ta aporta na durabilidad, sostenibilidad di cuido y cuido mas humano.
- A inverti den desaroyo na Imsan di un departamento 'state of the art' di oogheelkunde pa retina y catarat cu ta brinda servicio den regio tambe
- Respaldo a haya un edificio nobo na Mahuma cu ta mas adecua pa cuido di nan pashent
- Renobacion y expansion di ImSan ta termina na November 2021
- Introduccion y ehecucion di e excelente plan nacional di vacunacion contra di COVID19
- A crea Bureau Medicinale Cannabis Aruba
- Mudamento di HAP
- Introduccion di e FACT Team

DEPORTE

- A reintroduci olimpiada escolar bek
- A realisa e programa di Hoben Activo Hoben Feliz
- Pa prome biaha den historia Raceway Palo Marga tin su propio federacion
- A yuda diferente veld na Aruba cu iluminacion, material y limpieza
- Veld di Kudawecha a ricibi yerbe artificial
- A organisa 2 Premio Excelencia den deporte pa e atletanan cu mihor a destaca den e aña

A portrait of Geoffrey Wever, a man with short dark hair, smiling. He is wearing a dark blue suit jacket, a white shirt, and a purple patterned tie. The background behind him is a light blue geometric pattern.

KEN TA NOS MINISTER DI ASUNTONAN ECONOMICO, COMUNICACION Y DESAROYO SOSTENIBEL, GEOFFREY WEVER

Geoffrey ta tata di un yiu muhe di 7
año y un yiu homber di 5 año.

Un graduado di Notarieel Recht y
Fiscaal Recht na Vrije Universiteit
Amsterdam, Geoffrey tin mas di 15
año di experiencia den sector priva
como abogado y belastingadviseur.

Tambe Geoffrey ta duna les den
diferente materia na Universidad
di Aruba pa e ultimo 7 añanan
y mas recientemente staats- en
bestuursrecht y a cuminsa un
promotietraject riba e terreno aki.

E decision pa drenta politica a bin
door cu Geoffrey kier a duna un
contribucion positivo na nos pais a
base di tur e estudio y conocimiento
adkeri durante e 15 añanan di servicio
den sector comercial. Aruba tabata
tin mester di cambio, especialmente
riba e tereno economico y Geoffrey a
realisa cu no por keda para un banda
for di un posicion di confortabilidad,
wak y critica pero a dicidi pa purba na
duna un contribucion mas directo door
di participa na eleccion 2021.

CONTINUACION....



Geoffrey pa prome biaha a anuncia su candidatura hunto cu partido RAIZ dos luna prome cu eleccion y a logra un total di 1430 voto personal durante eleccion 25 di juni 2021 y door cu Geoffrey tawata e di dos persona cu mas voto personal riba lista di RAIZ Geoffrey a drenta Parlamento di Aruba y tambe a fungi como Lider di Fraccion di RAIZ.

Como Minister di Economia, Comunicacion y Desaroyo Sostenibel, Geoffrey lo enfoca riba topiconan relaciona cu diversificacion y modernisacion di nos economia, na un forma sostenibel, promove facilidad di haci negoshi door di bin cu un cuadro legal cu ta reduci redtape. E methodology principal lo ta pa traha cu tur stakeholders pa na un forma proactivo lidera y implementa e diversificacion di economia di Aruba.



KEN TA NOS MINISTER DI HUSTICIA Y SOCIAL, ROCCO TJON

“SALI NA DEFENSA DI BO PAIS”



Semper mi a sinti mi yama pa sali na defensa di esnan rond di mi. Despues di a realisa esaki mi a dicidi pa continua un estudio cu lo yuda mi cumpli cu e yamada aki. Esaki a conduci mi na e Nederlandse Politie Academie unda mi a ricibi amplio conocimiento referente e topico aki. Determina y pasiona, mi a regresa mi isla unda mi a ocupa diferente funcion den Cuerpo Policial y a guia y lidera diferente ekiponan den nos cuerpo. Funcionnan y tareanan cu mi a eherce cu alma y cuerpo y cu hopi orguyo pa 12 aña. Despues di mi carera den Cuerpo Policial mi a tuma e siguiente reto como Director di Aruba su Instituto Correcional. Combina cu mi carera mi a amplia mi conocimiento na Universidad di Aruba y orguyosamente a obtene mi masters den Business Administration.

CONTINUACION....

Na aña 2017 mi a sinti mi yama un bes mas pa sali na defensa, e biaha aki como politico y despues como Parlamentario y Lider di Fraccion di nos partido MEP. Den Parlamento mi a encabesa e comisionnan fiho di Husticia, asuntonan di Reino y asuntonan Norte Americano. Como politico mi a haci tur esfuerso pa for di den Parlamento percura pa inversionnan den e cadena Hudicial ta posibel y pa nos autonomia no wordo mina.

Y aworaki a presenta e oportunidad pa sirbi for di e plataforma ehecutivo, como Minister encarga cu Husticia y Asuntonan Social. Un combinacion cu ta brinda un oportunidad unico. Mi lo haci bon uzo di e oportunidad aki pa ta di balor agrega pa nos dushi pida barranca.

EXPERIENCIANAN ANTERIOR

- Parlamentario: Fraccion di MEP (2017 - 2021) A fungi como Lider di Fraccion di MEP.
- A presidi 3 comishon; Asuntonan di Husticia, Asuntonan di Reino y Relacionnan cu Estados Unidos.
- Director di Instituto Coreccional di Aruba (KIA)
- Ministerio di Justicia (2016 - 2017)
- Carga responsabilidad pa un bon funcionamiento di e organisacion.
- Desaroya un maneho riba detencion di hende y tene cuenta cu e seguridad interno.
- Responsabel pa desaroya un maneho penitenciario integral.
- Hefe di Staff di Korpschef
- Cuerpo Policial Aruba (2012 - 2016)
- Encarga cu e maneho di e Departamento di Integridad y Seguridad, Comunicacion, Informacion y Prevencion, Maneho y Asesoramiento (Conseho). Encarga cu Departamento di Interpol.
- Encarga cu Departamento di Apoyo di Víctima (Slachtofferhulp). Responsabilidad pa formulacion di un maneho nobo, inovativo y eficiente pa e organisacion en general.
- Consehero di Korpschef y miembro di e Management Team.
- Encarga pa traha planificacion anual y e resumen anual di Cuerpo Policial Aruba.
- Vigila e estadisticanan Policial y controla si nan a logra nan obhetivonan/metanan.
- Representante di Korpschef den consulta cu e socionan local, externo y internacional.
- Otro ocupacionnan di trabou
- Cuerpo Policial 2004-2016
- Part-time instructor na "Divisie Politie Opleiding en Ontwikkeling (2004-2012) Hefe Division "Centrale Recherche" (2004-2012) Comandante di e seccion Team di Aresto (2004-2016)

EDUCACION

Universidad di Aruba
 2017 Master of Business Administration
 FBI Academy, Universidad di Virginia. Quantico, VA. USA
 2014 Leadership
 Doc-Opleidingen, Aruba
 2010 Hoger Management
 Lime Tree Aruba
 2008 Mediation
 NPA, Ossendrecht, NL
 2004 Aanhoudings- en ondersteuningseenheden (Unidad di Aresto AT)
 NPA, Apeldoorn, NL
 2000 - 2004 Leergang Tactisch Management
 Colegio Arubano
 1994 - 2000 V.W.O.



CURSONAN

2014 Instructor Active Shooter, NCIS Aruba
 2014 Oficial di Seguridad Nacional, FIFA Miami, USA
 2012 Supervisor Police Sniper, Sniper Craft Los Angeles, USA
 2012 Advanced Sniper, Sniper Craft Wisconsin, USA
 2011 Drug Commanders Training Conference, D.E.A. Aruba
 2011 Basic Police Sniper, Sniper Craft Florida, USA
 2011 Klinische Psychologie, Open Universiteit (OU) Heerlen, NL
 2011 Arbeids- en organisatie psychologie, OU Heerlen, NL
 2010 Sociale Psychologie, OU Heerlen, NL
 2010 Inleiding in de Psychologie, OU Heerlen, NL
 2010 Integriteit Management, K.P.N.A., Curacao
 2010 Vaste Kern Leidinggevende, N.P.A. Ossendrecht, NL
 2009 Officier incidentes afhandeling, K.P.N.A., Curacao
 2009 Leading Professionals, Deloitte & Touche, Aruba

Mi a lanta den e barrio di Savaneta y ta un profeshonal cu mas di 20 aña di experiencia den e aparato hudicial y asuntonan social.

ABILIDADNAN PROFESIONAL

- Dirigi y maneha cu exito aspectonan penitenciario.
- Dirigi y maneha investigacionnan policial grandi.
- Dirigi y maneha investigacionnan interno penal y disciplinario.
- Experiencia amplio riba tereno di seleccion di personal y e procedura di screening
- Abilidad den skirbi notanan di maneho.
- Implementa maneho nobo riba procedura di seleccion interno.
- Implementa procesonan di investigacion, maneho di integridad y ciclo di maneho y control.
- Implementa control y maneho di crisis y intervencion.

INTERESNAN PERSONAL

Deporte Lesa Skirbi Musica

KEN TA NOS MINISTER DI ENSEÑANSA Y DEPORTE, ENDY CROES



Endy Croes ta yiu di Mama Sofia Croes Rasmijn d.f.m y Everaldo Croes d.f.m.

Endy tin 53 aña y ta tata di 7 yiu, di edadnan entre 34 y 16 aña. Endy tin 25 aña felizmente casa cu su esposa Dilaila Croes-Odor.

Desde chikito Endy a lanta hunto cu su rumannan Everaldo, Sandra y Edmond den e dushi distrito di Sta Cruz. Su mayornan semper a haya importante pa nan yiunan por bay scol pa haya nan educacion pero alaves a enfoca den actividadnan pafo di scol. Asina a percura pa laga nan yiunan bay les di musica y dedica na deporte. Endy a siña toca drum y trombone cual el a haci pa hopi aña na unda el a toca den brasband y banda(nan) conoci di Carnaval. Endy a sirbi Misa y a toca riba Koor di Sta Cruz. Otro pasion grandi di Endy tabata baseball y softball. Tanto como atleta riba nivel di seleccion di pais y despues como dirigente a forma Endy su caracter y carera. Factornan Deseo, Disciplina, Dedicacion y Determinacion “4D” ta e base cu a transforma Endy den un lider den diferente posicion central tanto na Aruba como internacional.

CONTINUACION....



Despues cu Endy a gradua na Hulanda como Chemisch Analist, Endy a regresa Aruba y a traha den Refineria Coastal desde 1991. Endy a casa y a muda pa districto di Noord unda e ta bibando pa mas di 26 aña. Endy su yiunan a nace y crece den Noord. Despues di a traha 10 aña den Coastal, Endy a sigui pasonan di su defunto Tata (Efe) y Abuelo (Jendy) cu retonan nobo como entrepreneur. Asina Endy a habri y maneha su propio negoshinan entre otro Bar Restaurant den Sta Cruz y Botica Noord den Noord. Banda di esaki, Endy a fungi como un promotor exitoso organisando hopi show internacional y den ramo di deporte pa 12 aña largo e magnifico campeonato di softball Champ of the Champs cual a ricibi reconocemento di Confederacionnan Internacional manera WBSC Americas y CONSURSA. Desde 2001 pa 2009, Endy a fungi den Directiva di Lotto pa Deporte como Vice Presidente, Presidente y despues Director unda a logra triplifica e benta di Lotto pa Deporte di 16 miyon pa 42 miyon pa aña. Proyectonan manera Stadion Frans Figaroa, Parke Jaburibari, Veldnan na Pos Chiquito, complehonan deportivo Yara y Simeon Antonio, veld di Baseball Nady Croes/ Crismo Angela tur a wordo logra den e periodo 2001-2009 y ta papia pa nan mes.

Desde 2009 Endy a wordo eligi den Congreso International door di 120 pais como Vice Presidente di ISF (International Softball Federation) y na 2010 a wordo eligi Vice Presidente di CONPASA y ECASC, mientras na 2011 a bira miembro di Directiva



di CONSURSA. Esakinan tur ta plataformanan internacional dirigiendo e deporte di Softball.

Desde 2013, Endy a ricibi oportunidad pa subi lista di MEP y desde 2017 pueblo a honra Endy cu un stoel den Parlamento. Endy ultimo 4 aña den Parlamento a hiba un lucha tenas pa un husticia husto pa frena corrupcion. Alavez Endy a enfoca cu hopi pasion riba temanan manera Deporte, Economia y Infraestructura. Esnan cu conoce Endy sa cu Endy semper ta cla pa brinda ayudo cu su portanan habri pa pueblo. Endy ta un persona cu un bon curason un gran carisma, un luchado y trahado incansabel pa su pueblo. Endy ta conoci pa su determinacion pa logra su metanan.

KEN TA NOS MINISTER DI LABOR ENERGIA Y INTEGRACION, GLENBERT CROES



Nos a pasa gran parti di nos hubentud activo den e mundo politico te 1982 ora cu mi a bay studia den exterior. Mi tata semper a papia cu nos y envolve nos den su caminda di lucha pa libertad.

Despues di a gradua den Business Management na Webster University, Leiden Hulanda, mi a regresa Aruba. Mi prome funcion laboral tabata di 'Junior Loan Project Officer' na Aruba Investment Bank.

Despues di tabata pa 12 aña activo den politica como Parlamentario y Gobernante, mi a retira for di politica na aña 2005 y a haci mi dos yiunan Lara y Thiara e prioridad den mi bida.

Desde 2018 mi ta felizmente casa cu mi señora Erika cu ken mi ta forma un hogar hunto cu nos 4 yiunan, Lara, Thiara, Soffy y Adrian.

Politica semper a keda mi pasion y na 2013 mi a haya e oportunidad pa haci un re-entrada den politica como candidato nr. 29 riba lista di MEP.

Den mi prome salida como e ultimo candidato riba lista, mi a obtene 2369 voto y a bira representante di Pueblo den Parlamento.

CONTINUACION....

Na 2017 mi a haya e confiansa di 2491 votador. Esey t'e aña cu MEP a drenta Gobierno y Lider di nos Partido Evelyn Wever Croes a pone su confiansa den mi designando mi e cartera di Asunto Social y Labor. Na eleccion di 2021 mi a keda e 3er votegetter di nos prestigioso poder, un gran honor pa mi persona.

KICO MI A HACI:

'93-'94 Parlamentario
'94-'98 Minister di Transporte, Comunicacion, Utilidad y Deporte
'98 -'00 Parlamentario
'00-'01 Minister di Transporte, Comunicacion y Utilidad
'01-'05 Parlamentario
'13-'17 Parlamentario
'17- '21 Minister di Asunto Social y Labor
'21 - Minister di Labor, Energia & Integracion

KICO MI A LOGRA:

Desde cu mi a asumi e cartera di Asunto Social y Labor nos a logra hopi riba tereno laboral y social.

LOGRONAN LABORAL:

2017: A para tur ontheffing y a hiba e maneho di "local prome".
2018: A reduci cifra di desempleo for di 8.9% na 2017 te na 5.2% den 2019
2019: A aumenta salario minimo 2 biaha te na AWG 1815.35
2020: A introduci FASE di AWG 950 pa esnan cu a perde trabou y 60% di Subsidio di Salario pa mantene hende na trabou
2021: Lo introduci TIO cu lo ta entre AWG 1250 te cu maximo AWG 2950

LOGRONAN SOCIAL:

1. A instala Sociaal Crisisplan y a destina 36.8 milyon como fondo pa percura pa seguridad y proteccion di nos mucha-, hoben- y famianan.
2. A bin cu FASE y COVID Bijstand
3. A aumenta e suma pa cubri gasto di entierro na AWG 4000
4. A transferi 750 mil florin di presupuesto di Ministerio pa Fundacion pa Nos Comunidad, pa por sigui reparti pakete di cuminda pa esnan cu di un dia pa otro a perde tur cos pa via di COVID19
5. Un yiu di 18 aña+, cu ta biba cu su mayor of su grandinan penshona, awor por haya Bijstand.
6. Formacion Social awor ta permanente y awor ta ofrece trayectonan pa hobennan femenino tambe
7. A institui Depto. di Mucha y Hoben cu ta encarga cu implementa y reenforza leymanan nacional y tratadonan internacional pa cu proteccion di mucha y hoben
8. A empodera e team di CEDEHM (Centro Desaroyo Hende Muhe) cu mas personal, pa por asisti e hende muhe pa desaroya y logra tur su metanan.
9. Bureau Traimerdia awor cu tarifa socialisa y cu extra localidadnan, ta ofrece servicio di Traimerdia na nos muchanan di scol basico cu un vision nobo.
10. Entrante 1 di juli Fundacion pa Nos Comunidad adicionalmente, lo tuma over e ayudo di cuminda cu anteriormente Rode Kruis tabata brinda. Un programa di ayudo di cuminda na nivel nacional.

Nos mision ta 100% recuperacion di nos Pueblo.
Nos vision ta e futuro nobo cu Aruba merece.
Cu Bo nos ta logra.



MISION LABORAL:

1. Recuperacion 100% salarial di sector publico y sector priva
2. Ta continua cu e maneho di pone trahadonan local, profesionalnan local y contratistanan local prome na trabou.
3. Lo ehecuta Aruba Kier Traha cu ta bira trayecto di recapitacion (her-, om- en bijscholing) pa yuda nos hendenan bek cu un trabou.
4. Tur reforma laboral lo wordo realisa atraves di e Dialogo Tripartita Social Laboral – DTSL unda cu consulta participacion y acuerdo cu tur gremio nos lo encamina e mehoracion y modernisacion den mercado laboral.

MISION DI INTEGRACION:

E cartera aki ta brinda nos e oportunidad pa bay bek na e principionan riba cual pais Aruba a ser funda, a base di respet pa otro y den union. Tur cu a bin Aruba pa lucha hunto cu nos pa construi un mihor futuro pa nan mes, ta na mes momento contribuyendo na un miho futuro pa Aruba. Integra den un pais ta sumamente importante. Integracion ta mucho mas cu djis un permiso laboral y/of di estadia. Integracion ta social, economico y cultural.

Cu union y integracion como su meta, Minister Glenbert Croes ta sintie sumamente honra di por sirbi nos Pais un biaha mas den Gabinete Wever Croes II.

Su mision ta harmonisa y unifica e maneho di Integracion cu eficiencia y humanidad den trato y servicio.

MISION ENERGETICO:

Implementa e Politica Nacional di Energia pa sigura cu nos Pais tin e beneficio di e meta di Affordable, Clean, Reliable Energy, un vision cu sostenibilidad y proteccion di nos medio ambiente.



Pabien Aruba cu Gabinete Wever - Croes II 2021 - 2025

Aruba Mester di Nos Tur!

